

[Augsburg], 15. Mai 1557

An Joachim Camerarius d. Ä.

BSB, Clm 10370, Nr. 266.

Clarissimo viro, Ioachimo Camerario etc. Domino et amico suo colendo. Leipzig.

S. P. D. Veterem istam astrologiam pauci nostra aetate ita intelligere videntur, vt ad vsum accommodare queant. Quare magnopere opto, a te et Peucero in publicum ea de re sententiam vestram proponi cognoscendam, et de controuersijs quibusdam iudicium vestrum interponi. Hactenus eiusmodi nihil videre mihi contigit, quod animo meo satisfaceret, ac ipse Ptolemaeus ὁ φιλοσοφώτατος εἶναι φάσκων τῶν ἀστρολόγων, quoties friuolis rationibus et sua confirmat, et aliena oppugnat, suoque se gladio iugulat? Quoties Proclus eius interpres, sententias non declarat, sed peruerit et obscurat? Cardanus multum praestitisse videtur, sed multa idem reliquit, quae ego scire in primis cupio, quaeque eiusmodi sunt, vt sciri posse credam. Multum tribuere veteres stellis fixis, quarum asterismos nostrae aetatis astrologi ita transferunt, vt Μ, naturam ♀^{is} ✕ σ^{tis} induisse videatur, vt taceam de caeteris. Negliguntur a Cypriano nostro, qui te plurimum saluere iubet, stellae quae non primae magnitudinis sunt, aut multum ab ecliptica distant. quam recte haud scio. Alter Manilius et hunc secutus Pontanus. Iam quid de illa Aesculapij Myriogenesi dicemus? Vtinam in horoscopo non saepius toto signo aberraremus. Sed haec vobis curae erunt. Me fortuna voluit ἀχθοφόρον αἰγύπτιον εἶναι, ἀλλ' οὐκ ἀστροθεάμονα, quam ad rem natura mirifice me dicit ac potius trahit. ἀλλὰ τῆς τύχης μὴ παρούσης δυστυχοῦσιν αἱ φρένες. Quid ⊖^{is} ad σ^{tis} ♂ progressio allatura sit, declarabit euentus propediem. ἐπικρέμασθαι δοκοῦσι μεταβολαὶ ἐπὶ τὸ χεῖρον. Ἰσως δὲ κατὰ τὸν παρὰ Πλάτωνι ὅμηρον ἀποπεπέμψομαι ἐντίμως μὲν τῷ δοκεῖν, ἀλγεινῶς δὲ τῷ ὄντι. Quod si acciderit, et nihil grauius accesserit, Basileam ire decreui, ibique expectare fortunam commodiorem, si qua tamen restabit commodior. Nullum enim Germaniae locum noui, in quo minoris possim viuere, et eas opes hic acquisiui, vt necesse sit futurum ET gallam bibere et rugas inducere ventri. Quòd si clades publica priuatae calamitati adiungetur, malum conduplicabitur. Vtut sit, culpam cauebo, quod potero, de caeteris vnā tecum et sentio et cogito γένοιτο ὅπερ θεῶ φίλον. Monachum meum ad te misissem, si ipse Francofordiam iuissem. Quae facultas nunc mihi negatur, nisi per longas ambages, et Oporinum anteuenisse mihi puto. Idem etiam de Cypriani opere sentio. quod quia ornare studui potius quam potui, ἐνίους τῶν μεγιστάνων offendī, ἀλλὰ τὸ πραχθὲν οὐκ ὡν ἀπρακτὸν γένοιτο. Hulderichus Fuggerus honestiss[ime] tibi cupit, quam suam erga te voluntatem vtinam re ipsa declaret. Opuscula Mathematica pridem abs te expedita, propediem ad te missurum arbitror. Ait enim ea in itinere esse. Vale et ignosce τῇ κακογραφίᾳ. Vix Choniatae παραλειπόμενα ad Oporinum miseram, spe nonnulla paululum interquiescendi concepta, cum ingens librorum cumulus, cum impeditis rationibus affertur, quae me per totam hanc aestatem occupabunt, vt nec valetudini nec studijs seruire possim. Sic me Fortuna mea, quod olim verissimo oraculo Norimbergae mihi praedixisti, perpetuo comitatur, vt Caesarem sua, καὶ πόνος πόνων φέρει. ἀλλ' Ἰσως καὶ τοῖσι μεμίξεται ἐσθλὰ κακοῖσι. eoque magis, si te in herili bibliotheca πρὸ τοῦ μετοικῆσαι ἡμᾶς, ἐμφωλεῦσαι contigerit. Iterum vale. Idibus Maij Anno 1557.

Hiero[nymus] Wolfius.